

СӘБИТ МҰЖАННОВ

АЛТЫН АЙМАҚ







СӘБИТ МҰКАНОВ

АЛТЫН АЙМАҚ

ПОВЕСТЕР МЕН ӘҢГІМЕЛЕР

АЛМАТЫ
«ЖАЗУШЫ»
1988

6
31867 0



БАЛУАН ШОЛАҚ

(Ақыз)

Бұл күнде қырық тогызда менің жасым,
Камалдың бұзар кезім тау мен тасын;
Кешегі сентябрдің базарында¹
Көтердім елу бір пүт кірдің тасын.
Жиылып орыс-казак таң қалысты.
Болды деп Қаһарманнан² мынау басым.
Залок³ сап жетпіс бес сом күрескенде,
Сындырдым Карон балуан қабыргасын.

(Балуан Шолақтың өз өлеңінен)

1. «АЛЫП — АНАДАН ТУАДЫ»

Ол ауылдың қыстауы Қайрақты көлінің жағасында, қалың орманның арасында еді.

Қабағына қайғының бұлты оралып, кеудесін керне-ген шерді күркіреген күндей уһлеумен жеңілткісі кеп, көз жасы бұлақтай саулаған ауылды еліктегендей, я, қайғысына ортақтасқандай, сол күні құадің кара сұрғылт бұлты нәсерлей жауды, жел ышқына соқты.

— Болындар! Жөнендер, тез! Жоғалындар! — деп ат үстінен айдаһардай ыскырған полицейский урядниктің сілтеген қамшысы бұлттан жарқыраган наизағайдай ирлендеп, талайдың арқасын тіліп түсті.

Қасқыр талаған қойдай қызыл жон болған ауыл адамдары, басқа панаclar жер жоқтай, полицейский сабап айдал шыққан қораларына ығысып қайта-қайта тығыла берді.

— Өрт! — деді урядник ауылды қоныстан қуып шығара алмаған соң, лезде ауылдың әр жерінен қою қара түтінге бөлениген қара күрең жалын жарқ етті. Өрт ерік-сіз айдал шыққан ауылдың аузындағы жалыннан да ыстық жалғыз сез:

— Қайран қоныс, хош бол!

Бұл бейқам отырған ауыл еді. Өткен жазда болған болыс сайлауында сол ауылдың біреуі болыстыққа таласқан Тоқсанбайдың Сыздығы деген байға қарсы шық-

¹ «Сентябрдің базары» революциядан бұрын Қекшетау қаласында күз болған.

² Қаһарман — фарсы халқының ертегі батыры.

³ Ерігісте шартқа тіккен ақша.

қан. Бірақ Сыздық выборнайларды¹ ақшамен сатып алғып, сайлаушыға да пара беріп, болыстыққа сайланған. Қолына мөр тиіп, әкімшілік тізгінің ұстаганнан кеңін, ол өзіне қарсы ауылдардың берекесін кетіруді ең бірінші міндеттім деп санаған. Сол жылы переселен управлениясы² ішкі Ресейдің қалаларынан көшірілетін переселендерге жер сұрағанда, Сыздық болыс кектенген ауылдарының ішіне қосып, осы ауылдың да жерін үсінған. Кешікпей землемер кеп жерді өлшеген. Бірақ ауылдың адамдары ол өлшеудің не өлшеу екенін түсінбей, қыстың жабдығын қамдап, бұрынғыша отыра берген.

Күз, ауыл шапқан шөбін қорасына үйіп, қар ұшқын-дап, қысқы үйіне кеп қонғанда, ызгарлы хабар кенеттен сап ете түсті:

— Көшесіңдер!

— Неге? — деп сұрады ауыл.

— Үш-төрт жұз үй крестьяндар көшіп келеді, алды келіп те қалды. Бұл жерде енді солар отырады.

— Біз қайтеміз?

— Онда біздің жұмыс жоқ. Қайда барсаң — онда бар.

— «Қой, олай болмас» деп ауыл бейқам отырғанда, арбалы, жаяуы аралас шұбырған крестьяндар кеп қалады.

Сол күні урядник те келді, ауылды өртеп көшірді. Міне, бар оқиға осы!..

Күз көшке әзірленбеген ауыл, урядниктің жыландай ысылдаган ызғары мен мылқау өрттің лебіне шыдамай қонысынан қозғалғанмен, тез жиналыш кете алмады, бес-алты шақырым ғана жерге жылжып, бас-аяғы жиналыш ақылдасты.

— Ал, қайда барамыз?

— Қайдан білейік, қайда барапымызды!

— Патшаға дейін іздену керек,— деді біреу.

— Мынаның былшылдан жоқты айтқаны несі? — деді екінші біреу ашуланып.— Пәлен мың шақырым Кет-рампорға барып патшаға арыз берем деп жүргенде, мына еңкейген кәрі мен еңбектеген жас қырылып қалмай ма? Әуелі осыларға баспана табайық та. Қайда арыз беруді содан кейін ойланармыз.

— Ол дұрыс,— деді біреулер,— бірақ бос түрған ко-

¹ Сайлауда дауыс берушілер.

² Россиядан қазақ даласына көшкен крестьяндарды орналастыратын патша әкіметтінің бір мекемесі.

ныс ешқайда жок. Жырыма шақты үміз. Қайда сыймызды.

— Маңай ел ғой. Жұбымызды жазбаймыз деуге болмас, атқа мініп ауылдарды аралап, биыл қысша баспана іздел бытырап орналасайық.

— Осыдан басқа амал жоқ.

Қатын-қалаш, бала-шаға қалың қарағайдың арасында тіккен күркелерде қалды да, ерек атаулы атқа мініп, маңайдағы ауылдарды аралап кетті. Ерек кіндіктен ауылда қалған жалғыз Баймырза.

— Е, сен неге жүрмейсің — деген сөзге оның берген жауабы:

— Балам жоқ, соны іздеймін.

— Қай балаң?

— Нұрмагамбет.

— Е, ол қайда еді?

— Тай үретем деп таңертең кетіп еді, содан тайы да, өзі де жоқ. Астындағы асау тай бір жерде өлтіріп кетпесе не қылсын!

— Ертерек неге айтпадың, ел боп іздесетін?

— Оған урядник болды ма! Есті жаңа жинап отырған жоқпаз ба?

Баймырзада жалғыз тайдан басқа жылқы болмайтын еді. Одан басқа көлігі — жалғыз қоңыр шолақ өгіз.

— Қатын? — деді ол, әйелі Қалампырға жүрт кеткен соң, — әлгі өгіз қайда екен, мініп баланы байқайын? Тай жығып өлтіріп кетті ме әлде? Аман болса жарап еді...

— Күні бойы мінген өгіз әлгінде ағытқаннан кейін отқа кетіп еді, үзаса керек, маңайда көзге шалынбайды.

Баймырза өгізді тауып алып келді.

— Суарған жоқ па ен, бар болғыр! — деді Қалампыр өгізді көріп, — буйірі ғашіне кіріп кетіпті ғой. Бар, суар!

— Жаңбырда өгіз су іздей ме?

— Со да сөз бе? Бар, суарып кел!

Ауылдың көлік ағытқан жері — өткен жыл мекенін переселенге өлшеп, үйлерін көктемде көшірген ауылдың жүрті еді. Сол жүрттагы қалың бүйра талдың арасында құдық барын Баймырза біледі.

Ол қарына шелек іліп, өгізін жетектеп жөнелді. Бұл кезде жаңбыр толастап, бұлт бытырай бастады. Бірақ желдің екпіні әрі күшті, әрі сұық. Қуннің батып бара жатқан белгісін батыстың жиегіндегі қызыл күрең бұлт білдіріп тұр.

Тал арасындағы құдықтың жиегі опырылған, айна-

ласы дөнегес сары балшық екен. Баймырза шелекке таққан жібін қолынан сусыта бергенде, тереңдегі сасықтау сары судың иісін сезіп, шөлдеген өгіз де мұрнын шүйіріп, тәмен еңкейді. Су толған шелекті Баймырза жогары көтеріп еді, иығына біреу қаққан сияқтанды, қараса саз балшықтан сырғанап, өгізі құдыққа құлап барады...

Сасып қалған Баймырза шелектің жібін табанымен баса койып, өгізді мүйізінен үстай алды. Сырғанаған өгізді ол қайдан тоқтата алсын. Өгіз күп беріп құдыққа түсті де кетті; өгіздің екпіні Баймырзаның өзін де алып кете жаздады. Сонда да тірі жан, өгізі құдыққа құлай бергенде, ол жанталасты. Құдық белуардан шүпілдеген су. Басы тәмен түскен өгіз табан аузында тұншығады. Жалғыз өгіз! Ол өлсе қайтпек?

Жан дәрмен Баймырза өгіздің мүйізіне байланған кендір жіптен мықшия тартып, тұмсығымен құлаған судан жоғары шығарды.

Дес бергенде, жуан қара тал құдықтың жарына төне біткен екен. Өгіздің әрі суланып, әрі сазданып, сусыған мүйіз жібін Баймырза жанталасып жүріп талға ілектірді де, сірестіріп байлады, өгіздің басы судан шығып тұрды.

Одан жоғары тартуға күші жоқ. Айла-амалы құрыған Баймырза: «Қа-лам-пыр!.. Қалам-пыр!..» деп бақыра берді.

Бұл дауыс құлағына шалынған Қалампырдың жүрергі дірілдей қалды. «Нұржаным¹ жамандыққа үшыраған болар ма?» деп сескенді ол. Осы ой тұла бойын түршіктірген Қалампыр дауысқа қарай жүгірді. Оған ере, аудындан бірнеше әйелдер, балалар жүгірді.

Қалампырдың Баймырзаға ең қатты айтатын сөзі: «бар болғыр!» еді.

— Бар бол, сен, бар болғыр! — деді ол айқайдың мәнісін есітіп, — зәремді алдың ғой! Былай тұр!

«Былай тұрдың!» мәнісіне түсінбей, шоқша сақалын шошайтып, кішірек көзін сыйырайтып Баймырза Қалампырға қараған кезде, Қалампырдың колы өгіздің мүйіз жібіне тиді. Құдыққа еңкейінкіреп, жіпті колын соза үстаған Қалампыр «хәүіп!» деп денесін жаза тартты. Сол кезде өгіздің мүйізі қолға ілігер жерге кеп қалды.

— Ора жіптің ұшын аяғыма! — деді Қалампыр Баймырзаға.

¹ Нұрмагамбетті еркелеткен аты.

— Неге?

— Нен бар, «неге» де! Ора, деймін тез!

Түсінбеген Баймырза, шұбалған жіптің артығын Қалампырдың жіліншігіне орағанда, сусымасын дегендегі, ұшын Қалампыр табанына басты. Содан кейін, жіптен қолын босатты да, тағы еңкейе түсіп өгіздің екі мүйізінен үстап, құдықтан суырып алды...

«Қарулы катын» деген сөз, Қалампыр туралы халыққа алдақашан тараған еді. Баймырзаның ағаш үй киятын қол өнері болатын. Сонда жәрдемдескен Қалампыр қолы жететін жерге жуан бөренелерді көтеріп әпепе беретін. Оған да жұрт сүйсініп қайран қалатын еді, ал мына құнан өгізді құдықтан шығаруы жұртты тіпті тамаша қалдырды, әрі таңдана, әрі разы боп, құдықты қоршаған жұртқа, Қалампыр масаттанғандай айнала қарап еді, көптің арасында Нұрмамбеттің де басы көрінді.

— Қалқам,— деді қуанып кеткен Қалампыр — қайда болдың, сәулем? Келші бері! Зәрем кетті ғой, сені жоғалтып!..

Сары сұр, қыр мұрын, өткір қара көзді бала қолын созған Қалампырға келе қоймай, сазарып тұрып алды. «Бар, бар!» деп қоршаған катындар итермелеп еді, бала тұнжырап кейін шегінді.

— Қаршадай боп мықтысын қарашы!— деді катындар, жап-жас басынан зілдей ғой, мынау! Қаққан қазықтай орнынан қозғалмайды!..

— «Алып — анадан туады, ат — биеден туады» деген қайда,— деді бір қартан әйел.— «Су мұрынға¹ тартса қаймыжықтай біреу болар еді. Кескін-кейпін, денесін көрмеймісің! Аумаған келін! Тек тіл-аузымыз тасқа!..

Қалампыр көтерген он төрт құрсақтан тірі қалғаны: ұзатқан екі қыз, Төлебай дейтін үл және осы Нұрмамбет еді. Нұрмамбет Қалампырдың сүт кенжесі. Сондықтан ба, әлде балалары өліп-өліп өлім сарқытын-дай болғандықтан ба,— әйтеуір, Қалампырдың жан-тәні Нұрмамбеттің үстінде. Бес жасына шейін емген Нұрмамбет, міне, биыл он бір жасқа шыққанмен әлі күнге шейін кешкі төсекке жатарда бір, танертен төсектен тұрарда бір, мамасын ііскемесе мауқы басылмайды. Нұрмамбет көзінен екі елі тайса, Қалампыр аңсайды да тұрады. Нұрмамбеттің екі бетінен құшыр-

¹ Жасы үлкен әйелдер Баймырзаны келекелеп «Су мұрын» дейтін еді.

лана сүймей, Қалампирдың аңсауы еш уақытта басылмайды.

Бүгін де солай аңсаған Қалампир, құдық басында шақырғанына келе қоймаған Нұрмағамбетке «бұл не-сі?!» дегендей жақындал еді, бұрынғыдай апалап бас салудың орнына, ол тағы да шегіне түсіп:

— Қек күшік қайда? — деді.

Қалампир үндемеді.

— Тұрымтай қайда? — деді.

Қалампир үндемеді.

— Қүйді ме? — деп сұрады бала, дауысы қалтырап.

— Қап, құдай-ай! — деді Баймырза, Қалампир тағы да үндемеген соң, мана у-шуда есімнен шығып кеткенін көрдің бе? Шошалада қамаулы тұрған қек күшік пен тұрымтай қала беріпті. Күйіп кетті-ау, бейшаралар!..

Нұрмағамбет еніреп қоя берді де, алақанымен бетін басып жүгіре жөнелді.

Жарылғалы тұрған жарадай жұрттың қайғысының аузын Нұрмағамбеттің жылауы тырнап ашқандай болды.

«Қайран қоңыс, қайран жер!» — деп үн қосып жылаған жұрттың дауысына құніренген дала да дауысын қости.

2. ҚЕКТІ БАЛА

Жаәдай бір байға ағаш үй қиған Баймырза, жұмысын бітіріп, еңбегіне тай алғып, ауылына өртенер алдындаған келген еді.

Қөпейлеу туған жириен қасқа тайдың денесі кішірек болғанмен, екі құлағы тас төбесіне наизадай шанышылған, қүйрық-жалы үкінің үлпа қанатындағы желпілдең, үрген қуықтай бұлтиған семіз, төрт аяғы қаққан қазық сияқты тіл-тік, сұлу тай екен.

Тайды көргенде Нұрмағамбеттің қуанғаны сондай, кішкене денесін кең дүниеге сыйғыза алмады, біресе екі санын шапалақтап аспанға қарғыды, біресе жатақап, жерге домалады. Оның бұлай қуануына бас себеп мынау еді:

Откен жазда, осы манайдағы ауылдар балаларын сүндетке отырғызды. Ондай балаға әкесі арнаулы ат, я тай атауға тиісті. Сүндеттер алдында балалар атаған аттарына, тайларына мініп, ауылдарды аралап жарысуға тиісті.

Балалар осы дағдымен аттарына, тайларына мініп шықты, аты, тайы жоқ балалардың ішінде Нұрмағамбет

қалды. Өзге жаяу қалған балалар, атты, тайлы балалардың жарысқанын қызық көріп, соңдарынан шуласып жүгіргенде, Нұрмағамбет жыртық киіз үйіне кірді де, жер бауырлап жатып алды. Босағада ұршық иірген Қалампир баласының неге жата қалған себебін сезді де, балаға білдірмей көзіне іркілген жасты теріс қарап жауалығымен суртті.

Сырттан Баймырза келді. Ол еркегімсіп Қалампирға ұрысты:

— Неге жылайсың, жамандық шақырып? Пайғамбардың сүндегі емес пе, бұл? Тек құдай тағала қожаның қолын женіл қылсын деп тілесейші!

Атсыз баланы сүндектеке отырғызу — балаға «өміріңде атсыз өт» дегенмен бірдей. Осы оймен ішке қайғысы сыймай жарылғалы отырған Қалампир Баймырзага шаш ете түсті:

— Эне, көр, баланды! — деді ол жасқа булыға сөйлеп, — Тоқсанбайдың сарайын қиғанда, тоңып өлетіндегі тон алдың. «Алдағы жазда Нұржан сүндектеке отырады, тон алма, тай ал» деп ем, тыңдамадың. Баланың тілеуін кескендей болдың, бар болғы!..

Жасқа булықкан Қалампир ар жағын айта алмады. Оның Баймырзага арнаған ызалы сөздері көзінен жас бол тәғілді.

Баймырза Нұрмағамбетті зорлықпен сүндектеке отыртты. Бірақ ол өзіне ішінен ант етті: «Алдағы жаз қолым қырқылып қалмаса, қосымша берсем де, ақыма бір тай алармын!»

Ол осы сертіне жетіп, еңбегінің үстіне, байға ақысана қосымша балтасын беріп, жоғарыда аталған жириен қасқа тайды алып келді.

— Міне, сүндегі атың, қалқам! — деді ол алдынан шыққан баласын бетінен сүйіп, — былтыр жоқ болса, биыл бар, тек алла тағала өміріндегі ұзақ қып, игілігіне мінгізсін!..

Баймырзаның әкесі батырлау болыпты-мыс дейді. Сол әкесінен қалған жалпақ бас, тұрманын күмістеткен қалмакы ерді үйіне көптен жылқы бітпегенмен Баймырза тоздырмай сақтап, қасиеттеп, төріне іліп қоятын еді. «Киесі бар, аруақ соғады» деп ол ерге қатын-қалаштың қолын тигізбей, өзі ғана үстайтын еді.

Жириен қасқа тай босағасына кеп байланған соң, қуанышы қойнына сыймаған Нұрмағамбет ілулі ерді үйден алып шықты. Баймырза:

— Қоя тұрсайши, қалқам! Тай ешқайда кетпес, қол

қасы аман болса, бойы өсінкіресін!— деп еді, Қалампир Баймырзаға зекіп тастанды:

— Тиыш отыр әрі, мыңқылдамай! Ол тай жокта өліп пе ек? Бала аман болсын! Міне бер, қалқам! Әуелі үлкенірек баланың біреуіне мінгізіп бастықтырып ал, өзің мінем деп құлап қап журме!

Сыртта үлкенді-кішілі біраз бала тайды қоршап тұр екен. Ересектеу екі балаға құлағынан тұқырта бастырып койып, тайға ерді Нұрмағамбеттің өзі салды.

— Эй, эткемнің аруағы, қолдай гөр! Қалқамның жасын үзак қыла гөр, жасаған!— деп, Қалампир босағадан қарап жылап тұрды.

Баймырза да ішінен сол тілеуді тілегенмен, сыртқа дыбыс шығармай, тайды балаларға ерттесті.

— Кәне, біреуің мініп, бастықтырып беріндерші,— деді ол.

Ертеулі тайды құлағынан ұстап Баймырза балаларға айнала қарағанда, Нұрмағамбет қарғып мініп кеп алды.

— Қалқам, құларсың, тұс!— деді Қалампир тыска шығып.

— Өзің не айтып тұрсын, апа!— деді бала кейіп,— тілеулі тайымды біреуге мінгізетін мен жынды ма? Жібер, әке!

Нұрмағамбет тебініп қалғанда, тай атып кеп кетті. Баймырза тайдың құлағынан айрылып қалды.

Құлағы қолдан босаған тай аспанға қарғығанда:

— Ал, үшты, бала! Жасаған-ай, сақтай гөр!— деді Қалампир үрейленіп.

Қарғыған тай секіріп жерге түсті, бала құламады, тайдың тізгінін қысқараС ұстап, қамшымен бауырынан тартып-тартып қалды.

Қамшыдан ышқынды ма, я баланы жыға алмайтынан білді ме, тай енді аспанға секірмей, тұра шаба жөнелді.

Шапқан тай лезде қалың орманды айналып, көзден гайып болды. «Құлап қалар, не бірдемеге соқтығар» деп қорыққан Баймырзаға көрші біреу ат беріп, тай кеткен жөнге шықса, бала ашық далада шоқытып жүр екен. Тай манағыдай емес, бастығып қапты.

— Кешікпей кайт, балам, көп шапсан тайын ақсап қалар,— деп Баймырза үйіне жөнелді. Ол ауылға келсе, урядник көшірмек бол жатыр екен. Әлекке кездескен Баймырза «байтал түгіл бас қайғы» дегендей, баланы

Іздеу түгіл, басымен қайғы бол өртенген ауылдан көшे қашты...

Әкесі қайт дегенмен, Нұрмамбет үйіне тез қайта қоймады. Тайды ол біраздан кейін билеп алды. Әкесінің «тайын ақсамасын» деген сөзін есіне тұтқан ол, тай еркіне көнген соң шабуды доғарып, тайын кейде аяңдаты, кейде желді...

Күн кешкіре болдырып терлеген тайын аяңдатып ауылға келе жатқанда оған, өзі дүниедегі ең бақытты адам сиякты көрініп кетті. Оның жеті-сегіз жасынан бергі ермегі — тұрымтай мен қырғиды баулып бөдене мен торғай алдыру еді. Бұл кәсіппен шұғылданып жаяу жүргенде, «эттең, бір, тай-ай?!» — деп арман ететін еді ол. Сол тай, міне енді астында!..

Жақын ауылдағы бір бай күз қойын қырыққанда, Нұрмамбет біrnеше күн жәрдемдесіп, ақысына қасқыр алатын көкшолақ тазысының бауырын көтерген күшігін алған еді. Күшікті үйіне жаяу көтеріп әкеле жатып «бұл аман болса, бес айда қоянға қосуға жарайды, келесі жылы үйінен шығады, содан кейін қасқырға да қосылады, сонда жаяу қалай қосам!» — деп өкінетін еді ол, міне, енді сол тай астында!..

— «Ат бар, күс бар, ит бар, менен бақытты кім бар?» — деп қорытты ойын Нұрмамбет.

Жел оның алдынан еді. Мұрнына өрт іісі келген ол, қалың қарағайдың арасынан жоғары қарап еді, кою кара түтін аспанға будақтала көтеріліп, бұлтқа үштасып тұр екен. Өрт шығады деген күдігі жоқ ол, «құлін сабынға алуға жаққан алабота болар» деп ойлады ішінен.

Сол кезде жел қатайып, алдынан жаңбыр келе жатқанын көрген бала, ауылға тез жетейін деп тайын тебінді. Шаршаған тай жорытып кете қоймай, тақымында бұлтында берді. Жаңбыр да жетті, жылдам жүрмеуіне ренжігенмен, әлі қылауы түспеген, қызығы басылмаған тайды ол сабамады...

Өртенген ауылды көргенде, баланың зәресі үшіп кетті. Теп-тегіс жанып жатқан ауыл!.. Бірақ жан да, мал да жоқ!.. Ауыл тып-типыл!.. Қүйген қоралардың, үйлердің қабырғалары, тәбелері опырыла күлап жатыр!.. Әлгіде қатты қүйған жаңбыр, қазір бәсендеде, бірақ өрт сөнер емес, қайта май қүйғандай өршелене береді.

— Бұл не?!

Коркудан ба, қою қара тұтіннен бе,— баланың тынысы тарылып, өкпесі алқымына тығылды.

Алқынған ол, тайы өрттен үрке берген соң, от бармайды-ау деген бір ағашқа байлады да, өзі жаяу жүгіріп үйіне барды. Онда да адам жоқ!.. Ол әкесі мен шешесін шақырып айқай салды — ешкім дыбыс бермейді!..

Бұлар қайда?!

Тілдері жалақтаған жалаңынға қарап, Нұрмағамбет аңырып тұрғанда, шошаланың күйіп жатқан төбесі жалл етіп ішіне құлады. Баланың есіне көк күшік пен көк тұрымтай түсті. Күшігі мен тұрымтайына жаңы ашыған оның отқа түсе қалғысы келді. Ұмтыла түсті де, тоқтай қалды. Ондағы ойы: «ауыл да, үй де өрттен қашқан шығар. Апам мен әкем күшік пен тұрымтайды не-бып тастап кетті екен? Қой тастамас!»

Осы оймен, тез ауылын табуға тайына қарай жүгіріп келе жатыр еді, алдынан шоқытып салт адам шыға келді де, бұны көріп тоқтай қалды,— қазақ тілін біле-тін таныс орыс фельдшері — «Бәске».

Бала еңіреп қоя берді. Фельдшер баланы уата алмады.

— Эй, залым патша-ай, иттің ғана баласы-ай, халықты осылай зарлатып қойған!— деді фельдшер баланы күшақтап тұрып.

— Кім дедің, ағатай, күйдірген?— деп сұрады бала жылап.

— Патша!

— Қайдағы патша?

— Барлық елді билейтін патша.

— Е, біз оның несін алдық, күйдіретін?

— Ер жетіп, есінді білгенде айтармын оны, балам! Эзір жассың ғой, нені үғасын. Ауылың да, үйің де «Қайыңшоқта» түнеп жатыр. Тез бар. Үйің жоқтап отырған. Жүр, тайына мінгізіп жіберейін!

Бұның әрең басқан баланы фельдшер қолтықтап әкеп, тайына мінгізіп, тайын жетектеп жолға салып, өзі жөніне кетті.

«Күшігім мен тұрымтайымды сұрамаған екем Бәске-ден!»— деп өкінді бала.

Күшік пен тұрымтайдан кейін баланың басын әурелеген ой — патша. Патшаға ауылдың не жазығы барын ол ойлап-ойлап таба алмады...

Ол патша деген сөзді еститін еді де, бірақ елді билейді деген жалпы лақап болмаса, оның қайда тұратынын, не істейтінін білмейтін еді. Міне енді сол патша-

ны, әлгі фельдшер «өрт салушы» деп кетті. «Соған қарағанда деп ойлады бала — патша осы маңайда болу керек қой. Егер,— деп кіжінді бала,— қүйдіруі рас болса, күшім мен тұрымтайым күйсе, сол патшаны күшік пен тұрымтайдай үйітпесем, жер үстінде топырақ ба-сып жүрмейін, Нұрмамбет атым құрысын!»

3. КҮЙІК

«Патша» деген сөз Нұрмамбеттің жүргіне инедей шанышылды да жүрді.

Таныс фельдшер тағы бір келгенде Нұрмамбет патшаның қолға түспейтіндігін, оның әмірін бұл арада орындаушы урядник екенін ұғындырыды.

Фельдшер кетті. «Патшаның әмірін орындаітын урядник» деген сөзді ол есіне мықты үстады. Ендігі оның арманы урядниктен кек алу болды. Бірақ урядникті өлтіруге шамасы келмейтінін біледі.

— Енді не істеу керек?— деп өзінен-өзі сұраған бала, өзінен-өзі «қүйдіру» деп жауап берді.

Осыған ойын тоқыратқан ол, күйген ауылның жүртіна орнаған Қайракты селосына барып, урядник тұрағын үйді анықтап алды. Енді ол қолайлы жағдайды күтті, онысы — жаздың құрғақ кезі.

Жаз болды... Нұрмамбет тағы бір тұрымтайды үстап баулып торғай, бөдене, шіл сияқты құстарға салды. Осы ермекпен кейде жаяу, кейде құнан шыққан тайын мініп, үйіне екі-үш күнде бір-ақ келетін болды. Жылдар өтіп жатты. Кек баяғыдай. Ол он төрт жасқа шықты. Бір күні бесті шыққан тайын әкесінен сұрап мінді де, тұрымтайын алып аттанды. Бірақ оның бұл жолғы ойы аңшылық емес, урядниктің үйін қүйдіру еді. Сол ниетпен қалтасына бір қорап сіренке салды. Ол Қайрактыны төніректеп келді де, іргесіне жақын жердегі қалың қарагайдың арасында атын байлаپ отырды, ынтаны — урядниктің үйін қүйдіру!..

Қала үйкітады-ау деген кезде ол тұрымтайын қарагайдың бұтағына қондырды да, Қайрактының көшесіне кірді. Бұл — шілденің ыстық шағы еді. Қөптен жаңбыр жауамағандықтан — құрғақшылық. Оның үстіне, кешке қарай тұрган жел, түнге қарай қатайып кетті.

Ойында «қүйдіру»ден басқа сөз жоқ бала, селоның сыртын айналып урядниктің үйіне келді. Оның үйі жел жақ шетте, төбесін қамыспен жапқан қарагай үй еді.

Бала үйдің жабығына өрлеп шығып, төбедегі қамышына сірінке тигізіп еді, жел үрлеген от лап ете түсті.

«Үрдым ба, бәлем? Кегім қайтты ма?» деген бала жүгіре қашып атына жеткенше, лаулаған жалын үйдің төбесіне барып қалды. Бекінген жері берік ол, үйден үге үшқан жалынға қарады да тұрды... Лезде селоны жалын тасқыны көміп кетті... Құлағына мал-жанның азан-казан шулаған дауысы естілді, айналадағы ауа қоңырысп, құйғен ет пен май сасып кетті, бұл иістен жүргегі айныды, басы айналды...

Аздан кейін есін жинаған ол, құйіп жатқан селоның ортін сөндірер күші жоғын көрген соң, атына міне қашты...

Орттен бойын қашырганмен ойын қашыра алмады ол. Селодан алыстаған сайын, мана өртке қарап тұрғанда тұтанған аянышты ойы, енді басында сол өрттен кем лаулаған жок...

Фельдшер Бәскенің «бұл селодағы орыстарды патша еріксіз айдал әкелді» дейтін есінде. «Рас болу керек ол сөз,— дейтін еді Нұрмағамбет есейінкіреген кезде,— қандай халде келгенін көзімізben көрдім, жаяу-жалпы, аш-жалаңаш келді...»

Сондай халде келген орыстың кедей крестьяндары тұрмыс жасауға қаншалық азаптанғанын, үйді қалай салғанын, егінді қалай сеуіп, астықты қалай жинағын Нұрмағамбет көзімен көрді. Алғашқы кезде оларға одырая қараған қазақ ауылдары, іле аралас-қоралас боп, кейде қолма-қол ақыға, кейде несиеге жалданып үйлерін, қора-қопсыларын салысты, көлік беріп, кісі беріп егіндерін де егісіп жинасты, осы бірлескен еңбектің үстінде көпшілігі достасып, тамыр болып, бірінің жоғына бірі қарасып кетті, сондайлардың ішінде, Нұрмағамбеттің өз әкесі — Баймырзамен, өз ағасы Төлебай да жүрді, қолы епсекті шешесі — Қалампыр орыстардың тондарын, киімдерін тігісті. Сөйтіп, көрші қонған орыс селосымен еңбекте қоян-қолтық келісу арқылы, ауылдың кедейлеріне жақын жерден кәсіп табылып, бұрын алыстан іздейтін нанды енді жақыннан және арзан бағамен алды. Бұрын өзі жыл тәулігіне балта шауып қазақ байларына қызмет қылғанмен, ағасы Төлебай да ауыл байларына жалшылықта тұрғанмен, тапқандары тамағына жетпейтін бұл семья, орыстың жұмысында араласа, өзгеге тоймағанмен, нанға тоятын болды, бұрын шешесінен собалак сұрап жылайтын ерке

31867

Нұрмамбет, әкесі, шешесі, ағасы орыс жұмысына аласқан соң-ақ нанды аузын толтыра асайтын болды...

Әзге орыстардың да жұмысына араласқанмен, Баймырза семьясының көбірек қолғабыс тигізгең шаруасы — Бәскенікі еді. Бүкіл ауыл боп «Бәске» атап кеткен фельдшердің аты — Василий Петрович Курганов. Әлдекайдағы адам дәрігерінің фельдшерлік курсын бітіріп, бұл араға жас шағында келген ол, қайда туғанын ауыл адамдарына айтканмен, географиядан хабары жоқ ауыл түсінген, білген емес. Олардың түсінген, білгені — алғаш келгенде қазақша бір ауыз сөз білмейтін ол, ауыл арасында тұра келе, қазақ тіліне судай болып алды. Оның үстінен мінезі және ісі жақсы болғандықтан ауылдың өз баласы сияқтанды да кетті. Сөйтіп жүріп, жақын жердегі селоның бір қызына үйленді де, балалы-шағалы болып кетті. Үлкен баласы — Антон жиырмаға таянып қалды, одан кішісі — Андрей Нұрмамбетпен жасты, одан кейін тағы да екі-үш ұсақ баласы бар...

Бұрын жақынырак жердегі бір селода тұратын Курганов семьясы, Қайракты селосы орнай, қызметіне жақын жерге мекен салды да, көшіп келді. Оның саманнан салған үйі де, қора-копсысы да көбінесе Баймырза мен Төлебайдың қолынан тұрды. Егінін де солар салысты. Сонымен, бұрын да көңілдес Курганов, Баймырзамен енді тіпті жақындастып, туыстай болып кетті.

Урядникке сол Кургановтың сөзімен өшіккен Нұрмамбет, үйін күйдіруге жиналғанда, тунде ұрланып ба-рып, қамысты тәбесіне сірінке тұтатқанда, әзге крестьяндардың үйлері де, Кургановтың үйі де бірге кетеді деп еш уақытта ойлаған жоқ еді...

Енді, міне, жаппай күйген селоның арасында, Кургановтың үйі де кетуіне Нұрмамбеттің ешбір күдігі болған жоқ...

«Үйі ғана күйсе бір сәрі гой,— деген ой кеп кетті оған, өрттен атына міне қашқанда,— жандары күйсе қайтім!..»

Бұл ойдан кейін, оның басындағы ой өрті лаулап, есінен тіпті тандырып жіберді.. Жалын құшқан атының үстінде ол әрен отырды...

Кейін естісе өртке күйіп өлген адам жоқ екен, жараланған адам көп екен, солардың бірі — Курганов. Өзі ауыр жаараланған оның әзге жандары аман қалыпты да, мал-мұлкі түгелге жақын кетіпті. Түгелімен арса болып қалғандар да аз емес дейді, күйдірген мәлімсіз адамды, азапқа, шығынға ұшырағандар қарғайды дей-

ді. Бұл сөздерді естіген шақта, қылмысына өзін-өзі қаты кінәлай, қарғай отыра, «обалың патшага! Сендерді де, бізді де осылай күйікке ұшыратқан патша!», — деді Нұрмамбет.

4. ҚАМБАДАҒЫ ҚАСҚЫР

Күн батып барады... Құндіз қардың бүрқасыны басылып, жел тынды. Ақшыл бұлттан аспан аршилып, қыстың қызыл шұнақ аязы буркеусіз бетті шымшылай бастады. Малдарын қорғаға жайғастырған ауылды да аяз қорғалатып, үйді-үйіне қуып тықты.

Қалың қарағайлы орманның ашық алаңына қыстаған аз ауылдың адамында қарақышыдай қалтиып дала-да тұрған жалғыз Баймырза. Оның кішірек көзі, орманың арасына қараған сайын қадала тұседі.

— Неғып тұрсың әй, үйге кірмей! — деді ұшқыны шашыраған күлді төгуге далаға шыққан Қалампир.

— Баланы қарап тұрмын!

— Қай бала?

— Нұрмамбет ше?

— Бетім-ау, мен ауылда ойнап жүр екен десем, сол бала таңертең кеткеннен әлі жоқ па?!

— Төлебайды жіберіп іздетіп ем, барлық үйді қарап келді, балалары үйлерінде дейді. Нұрмамбет жоқ дейді.

— Бар болғыр, сол бала ма?! Ұлғи осылай іздетеді де жүреді. Сол бар болғыр, қамбаға тұсіп кетіп жүрмесін! «Қой!» десем қоймайды, бар болғыр! Қоян аулай ма? Құр аулай ма? Үйде отыруы жоқ!

— Мен қарап келейін, сен асынды істе. Бала тоңған шыгар. Үйге келе ыстық ішсін. Жолына жөргем ілікпесе, үйге келмейтін әдеті емес пе оның?

Қалампир үйге кірді. Баймырза қамбаға жөнелді...

Оқиға былай еді: сол жылы боран көп бол, қарағайлы орманның жел жақ бетіне ағаш бойына жақын күртік үйіледі. Сол күртіктің қоян жүретін жымынан Нұрмамбет, кісі бойынан биік қамба қазды. Қамбаның аузын тар, түбін кен қазып, ішіне сабан тастап өртеді, қары еріп, мұздақ бол катты. Содан кейін бетін шырпымен жауып, үстіне шөп тастады. Жыммен жүрген қояндардың талайы бұл қамбаға құлады.

Нұрмамбет қайынан ұзынша құрық істеп, оның басына бау тақты да, қамбаға құлаган қоянды құрық сап ұстады.

Бүгін таңертéң дағдылы қалыппен Нұрмамбет құрықшасын ап қамбасына барса, шөп те, жапқан бұтак та жоқ, «Қанды басың бері тарт!»— дейтін еді ол, қамбаға коян түскенін сезсе. Сол сөзін айтып қамбаның жиегіне келсе, ішінде құлағы ербіген үп-үлкен бірдеме отыр... «Мынау не?» деп төне түсіп еді: желкесінің қара қылышқа жүні жылқының жалындай желкілдеген, тұмсығы жарты кез, үлкендігі тайыншадай, қара құлақ қасқыр!..

Төнген Нұрмамбетті қорқытқысы келгендей, қасқыр азу тісін сақылдатып, ырсыып ырылдады.

Не істей керек?

Ол ауыл арасында «балуан бала» атанған еді. Майдайдағы елде онымен құресетін бір де бала жоқ. Бәрінде ол жығып бітірген. Ол «Батыл бала» да атанған. Сол майдайдағы елдің баласы — тай, құнан үйретер болса, алғашқы қарқының басуды Нұрмамбеттен күтетін. Қаршадайынан ол асау тайдың құлағына жармаса кетіп, тырмысып айрылмайтын, үстіне мінген соң тай, құнан түгіл, ат туласа да түспейтін.

«Балуан бала», «Батыл бала» деген сөздер оны ма-саттандырып, құштілігін көрсете түсуге тырысатын.

Қамбаның қасында қасқыраға қарап тұрып Нұрмамбеттің менмендігі қозып кетті. «Өзім өлтірмей, біреууге өлтіртсем — менің мықтылығым қайда?— деп ойлады ол,— ертең басқа балалар мені мазақтамай ма? Қой, тәуекелге бел байлап, өзім-ақ жәукемдеп көрейін!»

Тұбі шоқпарлы қайын құрықшамен ыржып шоқып отырған қасқырды Нұрмамбет тұртіп кеп қап еді, арс етіп құрықты тістей алды. Нұрмамбет құрықшасын бері тартып суыра алмаған соң, қөмекейіне тығайын деп әрі итеріп еді, құрықша ортасынан имиіп сыйнуга айналды.

Ызаланып кеткен ол, «ауп!» деп жүлқып кеп қалып еді, екпінімен шалқасынан түсті. Құлап жатып құрығына қараса, сынған жоқ екен. Жалма-жан түрегеліп, қамбаға қайта төнді. Бұл жолы баланың жүлқынған қайратынан сескенгендей, қасқыр манағыдай шоқып отырғып, бедірептің қарамады, жан сауға іздеңдей қамбани шыркөбелек айналды да, жоғары қарғыды.

Жан ұшырды ма немене, қарғыған қасқырдың алдыңғы екі табаны қамбаның ернеуіне жақындала калды. Сол кезде, нақ қара тұмсықтан бала құрықшаның тубімен салып кеп жіберді. Қамбаның мұзын алдыңғы аяғымен тырнап із салған қасқырдың артқы аяғы тайды

ма, денесінің екпіні ме, әлде тұмсығына сокқы қатты тиді ме — шалқасынан жығылды.

Бала қасқырды жүқа шаптан құрықтың түбімен шаша қойып еді, ытып тұрған ол құрыққа ұмтыла бергенде, бала тістепней жұлып алды.

Қасқыр енді қарғымады. Бөксесін қамбаның қуысына тығып, балаға көзін тесірейте қарап, жоғарғы ернін шүйіріп, бірақ дыбыс бермей тым-тырыс жатты. Тек бала тұрткенде ғана арсыладап, құрыққа жармасты.

— Не істеу керек?

Қасқыр дем алған кезде, баланың көзі тыржитқан мұрнынан тамшылап ақкан қанға түсті.

— Эп-бәлем, жара салдым ба! — деді ол. — Құтылмассың енді менен!.. Әлде, жаздыгүні жалғыз бұзауымызды жеген антүрганның өзі сенбісің?

«Мен болғанда не қыласың?» дегендей қасқыр тыржындағанда қойды.

Баланың белбеуіндегі қында мүйіз сапты кездігі болушы еді. Кездік үнемі шаш алғандай қылпылдан тұратын. Ауылдағы ұста осы кездікті оған: «Тіл алғышсың» деп, көрігін басқандығы үшін, шым болаттан суарып, сыйға соғып берген.

Кездігі есіне түскен бала, қынынан суырып алды да, қалтасынан тастамайтын, жалпақтығы алақандай, ұзындығы кездей қайыстан таспа тіліп, кездікті құрықшаның ұшына тас қып байлады.

— Енді тістесең тісте! — деп ол қасқырға құрықшаның түбін ұсынып еді, ызалы аң шап етіп тістей алды да, тартқанда бөгеусіз босатты.

«Тілінді ме, тандайынды ма, әлде уртынды ма, — әйттеір бір жерінді кескен шығар, — деп ойлады бала, — әйтпесе неғып тез босаттың?»

Сынайын деп құрығын тағы ұсынып көріп еді, қасқыр ұмтылды да тістемеді. Қасқырдың аузынан қан шұбырды.

— Э, солай ма, батырым? — деді бала масаттанып, — жараландың ба?

Құрығын суырған бала, «булкілдегінің тұсы осы шығар!» — деп қасқырдың бүйірінен наизасын сұғып кеп қалды. Қасқыр ышқынып-ыршып түсті де, құрық тиген бүйіріне қарай дөңгеленді. Қасқырдың қалың түбітін тессіп шыққан қан, ку шөпке тұтанған оттай қызарапада жарқ етті де, сұрғылт жүнгө жіңішке қызыл жолақ салып, бауырын орап төмен тамшылады.

Бала піскілеуді жиілетті. Қасқыр бірде құрыққа

үмтүлсып, бірде жоғары шапшып жанталасты. Сондай арпалыстың біреуінде қалжырағандай болған қасқыр, секіре беріп шалқасынан тағы құлап еді, нақ кіндіктің түбінен бала пышақты қадай қойды. Қасқыр жандәрменде аунап түсіп, созылып тұра беріп, сүйретіле құлады да, оң жағына жантая кетті.

— Жұмысың біткен шығар,— деді бала,— енді шашышқылап терінді бүлдірмейін!

Бала үніліп қарап тұр. Қасқырдың денесі дірілдеп, құйрығы шошаңдал, арандай ашқан аузын малжандата берді. Сөйтіп аз жатты да, қасқыр сұп-сұлық бола қалды.

«Өлді ме, жоқ па?»— деген оймен, бала, енді құрықшасының басындағы пышақты шешіп алып, мұқылымен ғана тұрткілеп еді, денесі былқ-сылқ еткен қасқырда қимыл жоқ.

Қасқырдың өлгенін көрген баланың ойы, оның терісін үйіне сойып апаруға кетті. Осы оймен күні бойы әуреленіп, құрықшасының бауына қасқырдың мойнын ілектірді, содан кейін тартып көріп еді, зілдей бірдеме!

— Мынау қайтеді!— деп күш алғалы еңкейе бергенде, кеудесін тіреген ернеудің кары опырылып кетіп, бала қамбаға тоңқая құлады.

Құлаудан гөрі қасқырдан сескенген бала, жалма жан денесін оңалтып, пышағына жармаса түрегеп еді, қасқырда қимыл жоқ. Аяғымен тұртіп еді, қозғалмайды.

«Өлген екенсің, бәлем!»— деп аударып көрсе,— бұл жалғанның арланы!.. Тіпті құнан өгіздей десе де сыйтын!..

Бала қасқырдың сирактарын ірей бастады. Қанша уақыт алданғанын ол шамалаған да жоқ. Біраз мықшындал, терісін сыпсырып, енді шығайын десе айналғанда мұз. Пышақпен мұзды тесіп, қарды опырып еді, онда да малтығып тез шыға қоятын емес.

Баланың киімі жамаулы болғанмен жылы еді, оның үстіне қимылдаған дene тоқази қойған жоқ. Бірақ мана қасқырды өлтіру қызығында жүргенде, биялайын шешіп тастап еді, қамбаға құлағанда сол биялай сыртта қалыпты.

Құрықпен де, қолмен де қарды опырған оппа қармен біртіндей жоғарылаған бала, сыртқа шықкан кездे скі қолының басы ашуға айналды. Бала қолына қараса, қанданған саусақтары бозарып кеткен екен, «Үсіген

екен!» деген оймен ол жалма-жан қасқырдың терісін тастай беріп, саусақтарын қармен ықсылады.

Ауаның райы үскірік аяз екені сол кезде білінді, қо-
мына ұстаган қар ерімей, құм сияқты сықыр-сықыр ет-
ті. Сондай қармен ұқалаған он жақ қолы ерекше дуыл-
лады. «Үсіген осы қолым екен» деп ойлады бала.

Сол кезде баланың құлағына атын атаған дауыс сап
сте түсті, ол жалт қараса — әкесі!

Қөнілі көтерілкі бала, қолым үсіді деуге арланып,
әкесіне қылышын айтып мақтанды. Екеуі үйіне келді.

Қалампырдың қуанышы қасқыр емес, баласы. Ол
ұлыны «тоңды-ау, қалқам!»— деп жалма-жан шешінді-
ріп, аязда ғулдей жайнап қызарған ыстық бетін сүйіп:
«Қолың да тоңған шығар» деп ұстап еді, он жақ қолы-
ның саусақтары қансыз-сөлсіз сұп-сұр, әрі мұздай сұп-
сұық!

— Ойбай-ау!.. Енді қайтейін!— деді Қалампыр сас-
қалактап,— үсіген екен фой, мынау қолың?!

Жансызың саусақтарды ұқалап не қыларын білмеген
Қалампыр, «Құлымым-ай, енді қайтейін!» деп, еңіреп
қоя берді...

5. ЖАҒЫМДЫ ЖАЛШЫ

Қалампыр мен Баймырзаның еркіне салса, Нұрма-
ғамбетке өздері көрген өмір бейнетін көрсегпей, бұла-
қып өсіру еді.

— Бізді қойшы,— дейтін еді ол екеуі, ерлі-зайыпты
боп, ошақ басында онаша шүйіркелесе қалғанда,— аса-
рымызды асадық біз, жасарымызды жасадық біз. Біз-
дің пешенемізге тәңірінің жазғаны — бейнет екен. Бей-
нетте тудық, бейнетте өстік, бейнетте өмір кешіп келе-
міз. Енді төрімізден көріміз жуық...

— Өзіміз өмірден осылай өтуге мойынсұндық қой,—
дейтін еді олар ауыр күрсініп,— тек біздің бейнетті ба-
лаларга бермегей де!..

— Бірак,— деп өкінетін еді олар,— «алдыңғы арба
қайдан жүрсе, артқы арба содан жүреді» дегендей,
өмірдің біз кешіп келе жатқан азап жолына Төлебай
да түсті. Есін білгелі киген нәлет қамыт ол бейшара-
ның да мойнынан түсken жоқ. Ол да осы бейнетпен өте-
ді енді, дүниеден!..

Нұрмамбет жайына келгенде, олар әуелі өзара
ырағай-тырағай боп жүрісті. Баймырза да оны балам

деп жақсы көре тұра, «әжетке жарады-ау» деген шақта жұмысқа түсін тіледі.

— Эу, қатын!— деді ол бір күні Қалампирға — күн көрістері нашарлап кеткен бір шақта.

— Эу!— деді әйелі.

— Қысқа жіп күрмеуге келмей қойды ғой бұл!..

— Оны не қыл дейсін?— деді Қалампир, талай естіп құлағы үйрентген сөзге, әдеттеген жауабын беріп.— Ұзартатын ретін тапсан, мен саған қой деп жүрмін бе?

— Тағы да бір түйін жалғап көрсек қайтеді ол жіп-ке?

— Қалай?

— Төлебайды ғой, біз кісі есігіне сегіз жасынан бердік?— деді Баймырза, айттар сөзіне алыштан орып жеткісі кеп...

— Иә?— деді Қалампир, оның нысаналы сөзін сөзе қалғандай бол.

— Арқа еті арса, борбай еті борша боп жүр байғұстың. Жасы жиырмадан асып кетті. Жұрттың ондайла-ры үйленіп те қалды...

— Қалыңмалын тап та сен де үйлендір!..

— Несін кекетесің, қатын!— деді Баймырза демін ауыр алып,— таппайын деп жүрмін бе мен, қалыңма-лын... Ашпа-жалаңтың орны емес пе бұл үй, қолға тус-кенді ауызға қағып сап, тағы да жалақтап отыратын?..

— Өзің не айтқалы отырсың?— деді Қалампир ке-йіп,— соныңда айтсайшы, былай да аскынған кедейлік-тің жарасына шыбынды үймелете түспей.

— Айттайын дегенім,— үй ішімізбен түгел бейнетте-ніп тамақ асырап отырған жан емеспіз бе? Ауыр тұр-мысқа аз да болса себі тиер ме еді, қайтер еді, Нұржан-ды да біреууге қолқабысқа берсек қайтеді?

— Кімге?— деді Қалампир тікілене қап.

— «Он үште — отау иесі» демей ме, аталарымыз?— деді Баймырза, қорқатын әйелінің жуандай шыққан даусымен, тесіле қараған көз жанарынан қаймығып — амандық болса Нұржан сиді он үшке шығады. Тіл-ау-зым тасқа, соқтауылдай жігіт бол қалды...

— Кімге бергің кеп еді, жалшылыққа?— деді Қалам-пыр кимелеп.

Баймырза үндемеді.

— Кімге деп отырмын ғой?— деді Қалампир екіле-ніп — несін жасырасың, айт, кімге уәде бергенінді!..

Айтқанмен де ұсынысы өтпеуіне көзі жеткен Бай-

мырза, еркін билеп алған әйелінен сырын жасыра алмады.

— Тоқсанбайдікіне... — деді ол күмілжіп.

— Мә, апарып бер, мынаны! — деп Қалампыр еріне колын да шығарды, ернін де шығарды.

Тұңжыраған Баймырза орнынан тұрды да, үн-тұнсіз далаға шығып кетті.

Ол кете ағыл-тегіл жылаған Қалампыр, біраздан кейін үйіне оралған Баймырзаға, кей кездегі дағдысымен, енді жылы шырай беріп, жұмсақ сөз айта бастады.

— Несіне ренжисің, байғұс-ау? — деді ол. — Сенің айтқаның-ақ болсын дейік. Сонда не шықты? Сен тесік өкпе бол өмір бойы жалшылықта келесің, одан не шықты?.. Мен де саған шамамнан келгенше қолқабыс тигізіп келем, одан не шықты? Төлебай да тесік өкпе бол бізге қосылды, одан не шықты? Құн тырбанайық, тұн тырбанайық, бәрібір — бағы жоқшылық!.. Нұржанды да осы батпакқа батырғанмен не шығады деп ойлайсын?

— Бірдеме шығады деп жүрген жоқпын, — деді Баймырза «суға кеткен тал қармайды» дегендей, менікі амалсыздықтан айтқан сөз. Олай деуіме және бір себеп, — «сөзде қанқу жаман, ауруда шаншу жаман» депті гой, бұрынғылар. Жұрттың қанқуы да өлтіріп барады бір жағынан...

— Не деген?

— Өлеңге, домбыраға әуестеніп жүрген жоқ па, біз-дің Нұржан кішкене шағынан? Бала да болса санатқа кіре бастап жүрген жоқ па, сол өнерімен, жастардың арасында?.. Құншіл жұрт соны да көре алмай ма, не-мене, — «ата-бабанда сері мен сал жоқ еді, сенен де шықты бір сері; енді оның сәнді ер-турманын, атын, кім-кешегін әзірлеп бер» деп мазамды алатын болды құншіл, құлеген жұрт!..

— Оттай берсін! — деді Қалампыр кесіп айтқан үн-мен, — кісіден тіленген күніміз жоқ. Қазынамызға ас салып берген адам жоқ. Ашты-тоқты болайық, өз енбеттімізben күн көріп жатырмыз. Нұржанның да жалшылыққа тұrap күні қашпас. Бойы өсіп, бұғанасы қатсын. Жасынан жалшылыққа берсең, ез-ең бол жаншылып калар. Есін біліп, етегін жапқан соң өзі де қарап отырмас, ақылы бар бала...

Қалампыр мен Баймырза бұл сөзге қайтып оралмады, Нұрмажамбеттің ер жеткен, жұмысқа барам деген сөз өз аузынан шыққан күнін күтті.

Бірақ олар ұзак күтпеді. Қайрақты қаласы күйген-

нен кейін, жан-жақтағы ауыл адамдары боп, оларға Баймырза да еріп, үйлерін, қора-қопсыларын салысуға аттанарда:

— Мен де барам, әке! — деді Нұрмамбет.
— Қайда?
— Қалаға.
— Неге?
— Жұмысқа!..

Баймырзаның апарғысы, Қалампырдың жібергісі келмеп еді, Нұрмамбет «барам!» деген сөзінен танбады. Несіне тансын, жазықсыз күйдірген селоның қарғысы атқандай, жалғыз аты өрттен кейін көп кешікпей жамандатып өлді. Тігерге тұяқта, жалғыз сиырдан басқа мал жоқ. Оның сүмесі шайды шылаудан артықа жетпейді. Сәті түскен кәсіпке ғана кездесетін әкесімен, Тоқсанбай үйінде жалшылықта жүрген ағасы — Төле-байдың тапқаны, тақыл-түқыл тамаққа ғана жарайды. «Тәуір ғып өсірем» деген талаппен, бүтін киім-кешекті шешесі бұның ғана үстіне жапсырады да, өзгесі жамау-жасқаумен жүреді. Төсек-орын да тозған, киіз үй де тозған. Қысқы үйі үй емес,— үйшік... Осындай жағдайда тұрудың несі қызық!..

Бала шағында байқамағанмен, есейе келе бұл тұрмыстың кермек дәмін үй ішімен бөле татқан Нұрмамбет, ауыр тұрмысты жеңілдетуге көмегін қалай тигізуді білмей жүр еді, әкесіне күйген қаладан жұмыс табылған соң ерді де кетті...

Баймырзаның мамандығы — балташылық екені бізге мәлім. Қалың орманның арасына мекендерген Қайрактыда, күйіктен кейін де балташыға жұмыс көп табылды. Сол жұмысқа білегін түре кіріскең әкесіне, Нұрмамбет іздесе табылмайтын көмекші болды.

Ағашты мыжғалау жұмысына Нұрмамбет тілті кішкене күнінен үйір болатын: бәкімен, пышақпен, шаппа-шотпен, балтамен... дегендей, қолына не құрал түссе сонымен ойыншықтар жасайтын. Бірақ ол, көңіліне алған ойыншықтың долбарлап жобасын ғана келтіре алатын да, басқа шебер балалардай әдемі жасай алмайтын. Ал, домбыра шертуге, өлең айтуда кішкене күнінен-ақ шеберлене бастады. Мінезі ойнақы, қалжыңшыл ол, әлдекімдерді сықақтап, бірер ауыз өлеңді жанынан да шығарып жібереді. Оның үстіне, денесі өзі құралыпты баладан сом да, биік те боп өсіп, күрессе жасы қатарлас балаларды қолына да алмады, ересек балалармен де тайталас, итжығыс түсіп жүрді... Осы жайлары